



臺北个一角

燥絲絲个風，帶核轉秋个涼，一陣一陣在公園肚打迂迴，優美个音樂跔核涼爽个風，也傳到遠遠遠。認真行路个佬、食飽夜來這散步个人……，聽著這隨風四散个旋律、跳動个節奏，停腳，耳角角，毋受管酌个雙腳，斯像糖蜂吸蜜个樣，徙啊徙，徙對當天舞臺來咧！

這森林音樂會，係臺北市市立交響樂團在大安森林公園个年度大活動。臺頂指揮家一身烏西裝，肢骨嶸線、派頭，雙手擎到胸脯前个時節，斯像戰場項牽頭个大將軍樣，歸個場面受佢控制。指揮棒一攘，音樂旋律黏時鑽入眾人个腦膈肚去！大家个心跔樂曲千軍萬馬跳搖、隨節奏像細細流水盤過石面。感動人心个樂曲，在涼涼个秋風中迂啊迂，迂上樹頂，又洩到竹蒲、枸薑花叢間。浮啊浮、飄啊飄，公園肚个花草精怪乜手勾手，在優美个旋律肚搖啊搖、攞啊攞，天頂月光笑微微，用厥柔柔、清涼个光替這場音樂會做背景。

串場个主持人係創立樂團个先輩，佢用輕鬆、生趣个話語紹介團體、樂曲，大家都界弄去笑聲無斷！兩、三百人个公園看臺，頭到尾做下坐淦淦人，看臺个後背、脣口草坪項，共樣坐恁多人，有老、有嫩、有牽緊手个戀人、有毛白白个老人、帶狗摘貓來个、跔爺哀來个……，音樂聲一響，入神个程度，無分老嫩大細，連狗、貓都耳角角、目西西乖乖伏緊聽。到這下，正深深體會著臺北人个人文素養，比得文化下鄉時个演出，內容準講共款，臺北人，氣質還係有較爭兜！

日頭官疏床，係斯順核細路幹巷笕，來到大安森林公園咧！朝脣頭个光景同暗晡頭十分無共樣，露水官散，枸薑花在打早个清風中寬寬點頭，搖攞出一身个清香，係故氣，神經綁紮過故氣，香氣灌入五臟內肚時，係轉到該遠遠个土牛細莊頭，看著該兩片脣開淦淦枸薑花个細河壩，還有為著愛同香氣帶轉屋家分阿姆歡喜，硬擲硬揪還掣佢毋落个闊！還早，毋過運動个人毋會少，太極拳、五行操、元極舞、活血功……，恁得著个湯頭，公園肚做下有，斯驚人毋停動等，係一樣一樣試試跔核做，毋使幾久斯一身汗咧！公園外圍个車輛還係來來去去無一時停，毋過入到公園分人感受个係大樹遮蔭个恬靜，兩個世界毋使圍籬隔開，嘎自然有佢帶分個人个生活步調。

臺北，原旦係一個生份人，戴多日了，慢慢接觸厥無相同个面貌，往時腦膈肚个臺北印象，像冰砵溶化，一點一滴慢慢消融……。天光日，係愛坐利便个捷運，去欣賞靚靚个淡水日落！

作者：劉玉蕉

☆詞彙學習☆

【打 迴】da^ˋ din⁺ fui⁺：繞著圈圈轉。

【管酌】guan^ˋ zhog^ˋ：約束、管教。

【當天】dong⁺ tien⁺：露天。

【肢骨】gi⁺ gud^ˋ：骨架、身形。

【牽頭】kien⁺ teu^ˋ：領頭、打前鋒。

【攘】ngiong^ˋ：擺動、揮動。

【跳搖】tiau^ˋ chug^ˋ：跳躍、起伏。

【啊 啊】din⁺ a⁺ din⁺：轉啊轉。

【枸薑花】gieu^ˋ going⁺ fa⁺：野薑花。

【有較爭兜】rhiu⁺ ka⁺ zang⁺ deu^ˋ：有較好些。

【巷笕】hong^ˋ gong^ˋ：小巷弄。

【硬擲硬揪】ngiang^ˋ bang⁺ ngiang^ˋ kiu^ˋ：不顧一切，用力拉扯。

【湯頭】tong⁺ teu^ˋ：此處指項目。

【毋停動等】m^ˋ tin⁺ tung⁺ nen^ˋ：不動而已。

【冰砵】ben⁺ kud^ˋ：冰塊。